

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N j E

**po Prijavi namjere koncentracije privrednog subjekata Dukat mliječna
industrija d.d., Zagreb i privrednog subjekata Inmer d.o.o. za proizvodnju,
trgovinu i promet export-import, Gradačac**

Sarajevo
26. juli 2007. godine



Broj: 01-02-26-020-5-II / 07
Sarajevo, 26.07.2007. godine

Na osnovu člana 25. stav (1) tačka e) člana 42. stav (1) tačka d) člana 43. stav (2), a u vezi sa čl. 12., 14., 16. i 18. Zakona o konkurenciji ("Službeni glasnik BiH", broj 48/05) i člana 193. stav 2. Zakona o upravnom postupku ("Službeni glasnik BiH", broj 29/02), rješavajući po Prijavi namjere koncentracije privrednih subjekata Dukat mliječna industrija d.d., Marijana Čavića 9, Zagreb, Republika Hrvatska i Inmer d.o.o. za proizvodnju, trgovinu i promet export-import, Željeznička bb, Gradačac, Bosna i Hercegovina, zaprimljene pod brojem 01-02-26-020-II/ 07 dana 11.06.2007. godine, Konkurencijsko vijeće na 49.(četrdesetdevetoj) sjednici održanoj dana 26.07.2007. godine je donijelo

R J E Š E N J E

1. Ocjenjuje se dopuštenom koncentracija koja će nastati na tržištu proizvodnje i distribucije mlijeka i mliječnih proizvoda u Bosni i Hercegovini sticanjem kontrole kupovinom udjela u osnovnom kapitalu, kojim će privredni subjekat Dukat mliječna industrija d.d., Marijana Čavića 9, Zagreb, Republika Hrvatska, postati 100% vlasnik privrednog subjekta Inmer d.o.o. za proizvodnju, trgovinu i promet export-import, Željeznička bb, Gradačac, Bosna i Hercegovina.
2. Ovo Rješenje je konačno i upisuje se u Registar koncentracija.
3. Ovo Rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredni subjekat, Dukat mliječna industrija d.d., Marijana Čavića broj 9, Zagreb, Republika Hrvatska (u daljem tekstu: Dukat ili podnosilac Prijave), putem ovlaštenog punomoćnika advokata Marić Branka, Mehmeda Spahe 24, Sarajevo, je podnio Konkurencijskom vijeću Prijavu namjere koncentracije (u daljem tekstu: Prijava), kojom podnosilac Prijave želi kupovinom dionica steći 100% vlasništvo nad privrednim subjektom Inmer d.o.o. za proizvodnju, trgovinu i promet export-import, Željeznička bb, Gradačac, Bosna i Hercegovina (u daljem tekstu: Inmer).

Prijava namjere koncentracije podnesena je Konkurencijskom vijeću dana 11.06.2007. godine pod brojem: 01-02-26-020-II/07, u skladu sa članom 16. stav (1) Zakona o konkurenciji (u daljem tekstu: Zakon).

Prijava namjere koncentracije je podnesena kompletna pa je Konkurencijsko vijeće, dana 25.07.2007. godine dostavilo podnosiocu Prijave Potvrdu o prijemu kompletne i uredne prijave (broj: 01-02-26-020-3-II /07) u smislu člana 30. Zakona.

Podnosilac Prijave namjere koncentracije je podnio Prijavu za ocjenu koncentracije Komisiji za konkurenciju Republike Srbije (postupak je okončan donošenjem rješenja kojim se daje saglasnost za koncentraciju), dok prema Zakonu o zaštiti tržišnog natjecanja Republike Hrvatske, nije postojala obaveza prijave namjere koncentracije Agenciji za zaštitu tržišnog natjecanja Republike Hrvatske.

U postupku ocjene Prijave namjere koncentracije utvrđene su sljedeće činjenice:

1. Učesnici koncentracije

Učesnici predmetne koncentracije su privredni subjekat Dukat mliječna industrija d.d., Marijana Čavića 9, Zagreb, Republika Hrvatska i privredni subjekat Inmer d.o.o. za proizvodnju, trgovinu i promet export-import, Željeznička bb, Gradačac, Bosna i Hercegovina.

1. 1. Privredni subjekat Dukat d. d. mliječna industrija Zagreb

Privredni subjekat Dukat mliječna industrija d.d., Marijana Čavića 9, Zagreb, registrovan je kod Trgovačkog suda u Zagrebu pod brojem 06/13931-2, dana 02.01.2007. godine, registarski uložak sa matičnim brojem upisa 080307619, Republika Hrvatska. Ovom registracijom je promijenjen raniji naziv privrednog subjekta Lura d.d. Zagreb u Dukat mliječna industrija d.d. Zagreb.

Privredni subjekat Dukat pripada Grupi Dukat (raniji naziv Grupa Lura), koju čine sljedeći privredni subjekti :

- Privredni subjekat Ralu Logistika d.o.o. Sesvete, Klekova 2a, osnovan 1990. godine, kao privredni subjekat specijalizovan za drumski prevoz tereta u zemlji i inostranstvu.
- Privredni subjekat Dukat S d.o.o. Ljubljana, Šmartinska cesta 102., osnovan je 1998. godine u Sloveniji, i bavi se plasmanom Dukat-ovog proizvodnog asortimana na tom tržištu.
- Privredni subjekat Dukat d.o.o. Sarajevo, Rajlovačka cesta bb, (raniji naziv Lura d.o.o. Sarajevo) osnovan je 1999. godine sa ciljem prodaje Dukat-ovih proizvoda na tržištu BiH.
- Privredni subjekat Lura d.o.o. Beograd (u likvidaciji) Beograd-Leštane, Save Kovačevića bb, osnovan je tokom 2003. godine sa ciljem prodaje Dukat-ovih proizvoda na tržištu Srbije i Crne Gore, čije je poslovanje ugašeno tokom sticanja većinskog udjela u privrednom subjektu Somboled a.d., Sombor te se nalazi u postupku likvidacije.
- Privredni subjekat Somboled a.d., Sombor, Gakovački put bb, specijalizovan je za proizvodnju mliječnih proizvoda u kojem je (tada) Lura d.d. stekla većinski broj dionica krajem 2003. godine.
- Privredni subjekat Dukat doel Skoplje, Bulevar partizanskih odredi 18, je osnovan 22.11. 2006. godine sa ciljem prodaje Dukat-ovih proizvoda na tržištu Republike Makedonije.

Tokom 2003. godine osnovani su privredni subjekti Lura Holding d.o.o. Ljubljana, Slovenija i Lura Magyarorszag Vagyonkez kft, Budimpešta, Mađarska u kojima nije bilo aktivnosti od njihovog osnivanja. Privredni subjekat Lura Holding d.o.o. nedavno je likvidiran, što se namjerava učiniti i sa privrednim subjektom Lura Magyarorszag Vagyonkez kft.

Svi navedeni privredni subjekti koji pripadaju Grupi Dukat su u (..)**¹% vlasništvu privrednog subjekata Dukat, osim privrednog subjekata Somboled a.d. Sombor, u kojem privredni subjekat Dukat ima udio od (..)**% (na dan 31.01.2007. godine).

Dana 21.03.2007. godine vlasnik privrednog subjekta Dukat gosp. Luka Rajić, zaključio je Ugovor o prijenosu dionica sa privrednim subjektom B.S.A. International. Place du Champ de Mars 5, Brisel, Belgija, čime je otpočet proces preuzimanja Dukata koji je još uvijek u toku.

Privredni subjekat Dukat d.o.o. Banja Luka nije povezano društvo privrednog subjekata Dukat d.d. Zagreb i privrednog subjekata Dukat mljekare d.o.o. Sarajevo. Ne postoji vlasnička veza između privrednog subjekata Dukat d.o.o. Banja Luka i Grupe Dukat, te slijedom navedenog, privredni subjekat Dukat d.o.o. Banja Luka nije učesnik predmetne koncentracije.

¹ (..)** podaci predstavljaju poslovnu tajnu

1. 2. Privredni subjekat Inmer d.o.o. Gradačac

Privredni subjekat Inmer d.o.o. za proizvodnju, trgovinu i promet export-import Gradačac, Željeznička bb, upisan je u sudski registar Opštinskog suda u Tuzli, Rješenjem suda broj: 032-0-Reg-06-001934 od 13.12.2006. godine, registarski uložak broj 1-5884.

Prema podacima iz Prijave, privredni subjekat Inmer nema vlasničkih udjela u drugim privrednim subjektima u Bosni i Hercegovini.

Osnovni kapital privrednog subjekta Inmer iznosi (..)**KM, pri čemu je (..)**KM uplaćeno u novcu, a (..)**KM predstavlja vrijednost unesenih stvari.

Vlasničku strukturu privrednog subjekta Inmer, prije provođenja predmetne koncentracije činila su slijedeća fizička lica:

- (A.A.)**²; sa 99,47213 % vlasništva;
- (B.B.)**³; sa 0,30164% vlasništva;
- (C.C.)**⁴; sa 0,11311% vlasništva;
- (D.D.)**⁵; sa 0,11311% vlasništva.

Vlasničku strukturu privrednog subjekta Inmer, nakon provođenja predmetne koncentracije činit će:

- (A.A.)**, osnivač društva; sa 24,4622% vlasništva;
- privredni subjekat Dukat d.d.mliječna industrija, Marijana Čavića 9, Zagreb, Republika Hrvatska; sa 75,53779% vlasništva.

2. Pravni osnov i oblik koncentracije

Pravni osnov Prijave namjere koncentracije je Ugovor o prijenosu i preuzimanju udjela broj 1 i Ugovor o prijenosu i preuzimanju udjela broj 2, putem kojih će privredni subjekat Dukat steći 100% vlasništvo nad privrednim subjektom Inmer, zaključeni dana 01.06.2007. godine u Zagrebu.

Dana 01.06.2007. godine, u Zagrebu, privredni subjekat Dukat, zaključio je Ugovor o prijenosu i preuzimanju udjela broj 1 sa (A.A.)** iz Gradačca, BiH, kao članom i osnivačem privrednog subjekta Inmer. Navedenim ugovorom (A.A.)** privrednom subjektu Dukat, je prodao ulog od (..)**KM, što predstavlja 9,99985% osnovnog kapitala. Na ovaj način privredni subjekat Dukat je stekao manjinski udio u privrednom subjektu Inmer.

Istog dana tj. 01.06.2007. godine u Zagrebu, zaključen je Ugovor o prijenosu i preuzimanju udjela broj 2, između privrednog subjekta Dukat, s jedne strane i (A.A.)**, kao osnivača i člana privrednog subjekta Inmer, te (B.B.)**, (C.C.)** i (D.D.)** iz Gradačca kao članova privrednog subjekta Inmer, s druge strane. Navedenim ugovorom, (A.A.)**, privrednom subjektu Dukat, je prodao i na istog prenio dio svog uloga u privrednom subjektu Inmer koji odgovara ulogu od (..)**KM (65,01% osnovnog kapitala). Također, navedeni članovi privrednog subjekta Inmer na osnovu predmetnog ugovora, privrednom subjektu Dukat prodaju svoje udjele u privrednom subjektu Inmer i to:

- (B.B.)** prodao je privrednom subjektu Dukat, svoj udio u privrednom subjektu Inmer, koji odgovara ulogu od (..)**KM (0,30164% osnovnog kapitala),
- (C.C.)** kao član privrednog subjekta Inmer, prodao je privrednom subjektu Dukat, svoj udio u privrednom subjektu Inmer, koji odgovara ulogu od (..)**KM (0,11311% osnovnog kapitala),

² (A.A.)** podaci predstavljaju poslovnu tajnu

³ (B.B.)** podaci predstavljaju poslovnu tajnu

⁴ (C.C.)** podaci predstavljaju poslovnu tajnu

⁵ (D.D.)** podaci predstavljaju poslovnu tajnu

- (D.D.)** kao član privrednog subjekta Inmer, prodala je privrednom subjektu Dukat svoj udio u privrednom subjektu Inmer, koji odgovara ulogu od (..)**KM (0,11311% osnovnog kapitala).

Na osnovu gore navedenih ugovora, privredni subjekat Dukat preuzima privredni subjekat Inmer, i to sa udjelom koji odgovara ulogu od (..)**KM, što predstavlja 75,53779% osnovnog kapitala privrednog subjekata Inmer, dok (A.A.)**, kao član privrednog subjekta Inmer, zadržava svoj udio u privrednom subjektu Inmer, koji odgovara ulogu od (..)**KM, što predstavlja 24,46221% osnovnog kapitala privrednog subjekta Inmer.

Također, Ugovorom o prijenosu i preuzimanju udjela broj 2, (A.A.)** se obavezuje da će svoj udio od (..)**KM (24,46221% osnovnog kapitala privrednog subjekta Inmer) koji će držati nakon provođenja ovog ugovora, zaključenjem odgovarajućih ugovora prenijeti na privredni subjekat Dukat jednu polovinu svog udjela najkasnije do isteka prve godine od stupanja na snagu Ugovora o prijenosu i preuzimanju udjela broj 2, dok će drugu polovinu svog udjela na privredni subjekat Dukat, prenijeti najkasnije do isteka druge godine od stupanja na snagu Ugovora o prijenosu i preuzimanju broj 2.

Shodno tome, privredni subjekat Dukat će postati 100% vlasnik privrednog subjekta Inmer.

Pravni oblik koncentracije je sticanje kontrole ili dominantnog uticaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata i to sticanjem kupovinom većine dionica ili udjela osnovnog kapitala, u skladu sa članom 12. stav (1) tačke b) pod 1) Zakona.

3. Ukupni prihod učesnika predmetne koncentracije

U finansijskoj 2006. godini, kao godini koja prethodi predmetnoj koncentraciji, učesnici koncentraciji na dan 31.12.2006. godine ostvarili su sljedeći ukupni prihod, i isti je naveden u Tabeli 1.:

Tabela 1.

Ukupni prihod izražen u KM	LURA d.d.	GRUPA LURA	INMER
Svijet	(..)**	(..)**	-
Bosna i Hercegovina	(..)**	(..)**	(..)**

Upisom u sudski registar Trgovačkog suda u Zagrebu, dana 02.01.2007. godine sa registarskim uloškom pod matičnim brojem upisa 080307619, privredni subjekat Lura d.d. Zagreb, izvršio je promjenu naziva i od tada posluje pod nazivom Dukat d.d. Zagreb.

Konkurencijsko vijeće je iz navedenih ostvarenih prihoda na svjetskom tržištu i tržištu Bosne i Hercegovine, utvrdilo, postojanje obaveze prijave namjere koncentracije, s obzirom da su ispunjeni kriterijumi ukupnog ostvarenog prihoda privrednih subjekata, učesnika koncentracije na tržištu roba i/ili usluga Bosne i Hercegovine u godini koja je prethodila predmetnoj koncentraciji, u smislu člana 14. stav 1. Zakona.

4. Analiza relevantnog tržišta

Članom 3. Zakona i čl. 4.,5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Konkurencijsko vijeće je utvrdilo, da relevantno tržište proizvoda i usluga, učesnika koncentracije, u predmetnoj koncentraciji, je proizvodnja i distribucija mlijeka i mliječnih proizvoda.

Relevantno geografsko tržište za ovu koncentraciju je Bosna i Hercegovina, jer se proizvodnja i distribucija mlijeka i mliječnih proizvoda obavlja na cijeloj teritoriji Bosne i Hercegovine.

Slijedom navedenog, Konkurencijsko vijeće je kao relevantno tržište za predmetnu koncentraciju utvrdilo tržište proizvodnje i distribucije mlijeka i mliječnih proizvoda na cijeloj teritoriji Bosne i Hercegovine.

Popis i procjena tržišnih učešća glavnih tržišnih konkurenata, učesnika predmetne koncentracije na relevantnom tržištu, navedeni su Tabeli 2. i iznose :

Tabela 2.

R. b	Konkurenti	Tržišni udjeli (%)	Godišnji promet (u milionima litara)
1.	Mlijeko-produkt Kozarska Dubica	23,1%	(..)**
2.	Meggle, Bihać	18,8%	(..)**
3.	Dukat mljekara d.o.o. Sarajevo	14,0%	(..)**
4.	Tuzlanska mljekara Tuzla	9,1%	(..)**
5.	Inmer, Gradačac	8,5%	(..)**
6.	Milkos, Sarajevo	6,4%	(..)**
7.	Livanjska mljekara, Livno	3,8%	(..)**
8.	Banjalučka mljekara-Salford	3,6%	(..)**
9.	Ostali (Sappit, Vindija, Šabac)	12,6%	(..)**
	UKUPNO:	100,0%	164,50
	Ukupno (3+5)	22,5%	(..)**

Za analizu relevantnog tržišta korišteni su podaci iz Prijave i kao i podaci sa kojima raspolaže Konkurencijsko vijeće.

Na osnovu podatka iz Tabele 2. vidljivo je da najveće tržišno učešće na relevantnom tržištu predmetne koncentracije ima privredni subjekat Mlijeko-produkt d.o.o. Kozarska Dubica i ono iznosi 23,1%, odnosno (..)** miliona litara mlijeka, dok zajedničko tržišno učešće učesnika predmetne koncentracije iznosi 22,5%, odnosno (..)** miliona litara mlijeka.

Analizom podataka dostavljenih u Prijavi, kao i podataka kojima raspolaže Konkurencijsko vijeće, utvrđeno je da su tržišna učešća učesnika predmetne koncentracije na relevantnom tržištu znatno ispod tržišnog učešća od 40%, kojim se pretpostavlja da privredni subjekat može imati dominantni položaj, u smislu člana 9. Zakona.

Privredni subjekat Dukat mljekara d.o.o. Sarajevo vrši isporuku sa vlastitom distribucijom preko tri distributivna centra i to: Sarajevo (za regiju Sarajevo), Tuzla (za regiju Tuzla i dio Posavine) i Bihać (za regiju Unsko-Sanskog kantona). Također koristi i usluge isporuke preko dva distributera i to: privrednog subjekata MCI d.o.o.Široki Brijeg, kojim pokriva regiju Hercegovine i privrednog subjekta Dukat d.o.o. Banja Luka, kojim pokriva Republiku Srpsku i dio Posavine.

Privredni subjekat Inmer vrši distribuciju iz sjedišta Gradačca za sva područja Federacije, osim Sarajeva. Distribuciju u Sarajevu za velike kupce vrši preko svoje poslovne jedinice, a distribuciju za male kupce vrši preko distributera "Euroming" d.o.o.Sarajevo.

5. Procjena predmetne koncentracije

Imajući u vidu gore navedene podatke, iz Tabele 2., kao i ostale podatke sadržane u spisu predmeta, Konkurencijsko vijeće ocjenjuje da ova koncentracija neće stvoriti niti ojačati dominantni položaj učesnika koncentracije, budući da se neće moći u značajnoj mjeri ponašati nezavisno od stvarnih konkurenata na relevantnom tržištu, jer prema tržišnim učešćima konkurencije vidljivo je da postoji snažna konkurencija na tom relevantnom tržištu proizvodnje i distribucije mlijeka i mliječnih proizvoda, na tržištu Bosne i Hercegovine.

Predmetna koncentracija značajno će dovesti do povećanja produktivnosti i kvaliteta proizvoda na relevantnom tržištu proizvodnje i distribucije mlijeka i mliječnih proizvoda na tržištu Bosne i Hercegovine.

Uvođenjem novih linija, proširit će se proizvodni program sa inovativnim proizvodima, te tako pružiti potrošačima dodatne vrijednosti. Istovremeno će se kroz ulaganja, kroz sistem kontrole kvaliteta, osigurati higijensko-zdravstveni status proizvoda na najvišem tehnološkom nivou.

Cijeneći sve iznesene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom u smislu člana 18. stav (2) Zakona, kao što je odlučeno u dispozitivu ovog Rješenja.

6. Administrativna taksa

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Rješenja nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Sanja Božić